



Terenga 5: Hōtaka 38 – He kīanga wā

He Mihi

Ko Ako tēnei e pupuhi nei i te hau maiangi kia rere te tīere o te reo ki roto ki ō tātou kāinga maha, huri noa i te motu. Tēnā koutou i whakatuwhera i ō koutou kūaha, i ō koutou matapihi, i ō koutou whatumanawa ki tēnei kaupapa.

Hei Mahi Whakarongo

Nā Chris Winitana i uiui a Tākuta Ranginui Walker i te hōtaka o Te Tēpu. Koinei te horopaki hei whakarongo mā tātou i te rā nei.

Anei rā ngā pātai hei whakautu mā koutou:

- 1) He aha tā Ranginui whakarāpopotanga hei whakautu i te pātai?
- 2) He aha te orokohanganga o te ao, hei tāna?
- 3) He aha ētehi kīanga wā ka whakapuakina?

Kia whakarongo tātou ki ngā whakaaro o Tākuta Ranginui Walker.

He Whakamārama

Anei ētehi kīanga wā hei wetewete mā tātou:

- 1) **Mai i** te tīmatanga, **tae noa ki** te mutunga, he kaha tā koutou mahi.
- 2) E **kainamu ake nei** te huritau o taku tama. = E **tata** mai ana te huritau o taku tama.
- 3) Ka kai **tonu** tātou = **Ākuanei** tātou ka kai.
- 4) **Nō nā noa nei** ia i tae mai ai. = **Nō nā tata nei** ia i tae mai ai. = **Nō nakuanei** ia i tae mai ai.
- 5) **Nō onamata** ēnei tikanga. = **Nō whakapata** ēnei tikanga. = **Nō mai rā anō** ēnei tikanga.
- 6) **Nāwai, nāwai**, ka tupu haere te rākau. = **Ka taka te wā**, ka tupu haere te rākau.
- 7) Mai i tērā wā, **ā mohoa nei** = Mai i tērā wā, **ā moroki nei** = Mai i tērā wā, **tae noa ki tēnei wā**.

He Mahi Ī-papa

Whakamahia tētehi kīanga wā e pā ana ki te kaupapa kei runga i te Īpapa.



Hei Mahi

Tuhia mai he rerenga kōrero e rite ana ki ēnei te tikanga, engari he kīanga wā rerekē kei roto:

1. Ākuanei ka tīmata te pōhiri.
2. Nō mai rā anō tēnei waiata.
3. Mai i te tīmatanga, tae noa ki tēnei rā.
4. Ka taka te wā, ka tīmata te marangai.
5. Kua tata te rā maumahara i ngā hōia.

Whakautu:

Mahi Īpapa: Kua hipa te tekau tau, **mai i** te whakatūnga o Whakaata Māori.

1. Ka tīmata tonu te pōhiri.
2. Nō whakapata tēnei waiata.
3. Mai i te tīmatanga, ā moroki nei.
4. Nāwai, nāwai, ka tīmata te marangai.
5. E kainamu ake nei te rā maumahara i ngā hōia.